

INUIT ATAQATIGIIT

Inatsisartuni



UPA 2019/pkt. 28

28. marts 2019

Aqqa Samuelson

Issittup Imartaata qeqqani malittarisassaqaanngitsumik aalisarnerup pinngitsoortinnissaa pillugu isumaqatigiissummik Kunngearfiup Danmarkip atuutsitsilernissaata Namminersorlutik Oqartussanit akuerineqarnissaa pillugu Inatsisartut aalajangiiffigisassaattut siunnersuut.

(Aalisarnermut, Piniarnermut Nunalerinermullu Naalakkersuisoq).

Naalakkersuisut siunnersuut saqqummiussaannut Inuit Ataqatigiit qujapput.

Aalisarneq inuussutissarsiutitut Nunattalu aningaasarsiornikkut nappataasa pingaarnersaat naalakkersuinikkut pitsaanerpaamik aaqqissuussiffigissallugu pinngitsoorneqarsinnaangilaq.

Aalisarneq inuussutissarsiutitut illersorsinnaasoq anguneqassappat, siunissamilu kinguaassagut eqqarsaatigalugit piujuaannartitsinermik siunertaqartumik naalakkersuinikkut aqutsineq ingerlanneqartariaqarpoq.

Issittup imartaani aalisakkat siunissami iluaqutaajuaannarnissaat nammaqatigiinnerpaamillu inuiaqatigiinnut atugassanngortinneqarnissaat Inuit Ataqatigiit pingaartippaat.

Nunarsuarmioqataanitsinni aalisarneq Nunatta ilisarisaneeqaatigivaa. Taamaattumik aalisarnerup iluani ilisimatusarnikkut misileraanikkullu Nunarput ingerlatsivigissallugu nunanit tamalaanit soqutigineqartorujussuuvoq. Issittup Imartaata qeqqani ilisimatusarnermi misileraanermilu Nunarput peqataatinneqartariaqarpoq. Nunatsinni aalisarneq ineriisaaffigineqassappat ilisimatusarnerit misileraanerillu ingerlanneqartariaqarput. Issittup Imartaata isorartooruaq inuussutissarsiorfigissallugu imaannaanngissinnaasoq sapinngisamik nakkutigilluarneqarnissaa pisariaqarpoq. Issittup imartaani aalisakkat allanngutsaalinissaanut paarilluarneqarnissaanullu Nunarput assersuutaalluartaqarpoq. Nunat tamalaat ukiuni makkunani piujuaannartitsinermik siunertaqartumik aalisariaatsit isiginiartorujussuanngorpaat. Aalisarneq Nunatta ukiorpassuarni aningaasarsiornikkut nappatigissappagu piujuaannartitsinermik aalisarnerup ingerlanneqartuarnissaa Inuit Ataqatigiit piumasarivaat.

Akisuusaassuseqartumik nungusaataanngitsumillu Nunatta pissarititaanik atuineq pineqarpoq.

Nunat tamalaat isumaqatigiissutaanni issittumi nunap inoqqaavisa soqutigisaat najukkamilu inuit ilisimasaasa naleqassusiat aamma suliap ingerlaqqinnerani nunap inoqqaavisa najukkamilu inuit najugallit oqartussaaqataatillugit peqataatinneqarnissaat Inuit Ataqatigiit isumaqataaffigaat.

Aalisarneq pineqartillugu aalisartut susassaqtullu tamarmik peqataatinneqartuarnissaat Inuit Ataqatigiit pingaartippaat.

Taamaattorli ilisimatusarnermi misileraanerillu pingaarutilinni Nunatsinni aalisarnermi susassaqtut qanimut malinnaatinneqartuarnissaat Inuit Ataqatigiit piumasarerusuppaat, tassami aalisarneq ineriartortinneqassappat Nunatsinni aalisarnermi susassaqtut ilisimasaat aallaavigilluinnartariaqarput pinngitsoorneqarsinnaanattillu.

Issittup Imartaani aalisarnej eqqartorneqartillugu akisussaassusilimmik aqutsisoqarnissaa pinngitsoorneqarsinnaangilaq. Aamma aalisarnej eqqartorneqartillugu akisussaassusilimmik ingerlatsisoqassappat kikkut tamat oqartussaaqataanerat, kikkunnillu tamanik inissaqartitsilluni siammasissumik isumaqatigiissuteqartarnissamik isuma Inuit Ataqatigiit tapersorsorpaat.

Aalisarnej eqqartorneqartillugu peqataarusuppugut, isummanik tunniussa qarussuppugut suleqataarusullutalu. Taamaattumik Naalakkersuisut tapertaasalu aalisarnej eqqartorneqartillugu maangamut matoqqasumik periuseqarnerat akuersaanngilarput.

Nunatsinni tamakkiisumik akileraarutigut isertitat pingajorarterutaat aalisarnermit pisarput. Aalisarnej Nunatta aningaasarsiutitut nappatitut inisissimatillugu akisussaafferujussuuvoq, sunillu tamanik eqquisuulluni. Taamaattumik aalisarnej eqqartorneqartillugu aaliangiisoqalertinnagulu Naalakkersuisut tapertaasalu ammanerusumik periuseqarnissaat Inuit Ataqatigiinniit piumasaraarput.

Taamatut oqaaseqarluta Issittup Imartaata qeqqani malittarisassaqaanngitsumik aalisarnerup pinngitsoortinnissaa pillugu isumaqatigiissutip atuuttunngortinnissaa akuersaarparput.